

Illuliortiternernut aningaasalersuineq pillugu Inatsisartut inatsisaat pillugu Namminersorlutik Oqartussat nalunaarutaat

Matumuuna Illuliortiternernut aningaasalersuineq pillugu Inatsisartut inatsisaat nr. 39, 23. november 2017-imeersoq, allannguutit ukunani pineqartut ilanngullugit Inissianik aningaasalersuisarneq pillugu Inatsisartut inatsisaat nr. 36, 28. november 2019-imeersoq aamma Inatsisartut inatsisaat nr. 19, 30. november 2020-meersoq.

Kapitali 1

Atuuffa

§ 1. Inatsisartut inatsisaat una illunik sanaartornermut, iluarsaassinermit, allilerinermit pitsanngorsaaneremullu taarsigassarsinermit tapiiffigitinneremullu atorineqarpoq.

Imm. 2. Inissianut inuussutissarsiutinik ingerlatsiffigineqartussanut imaluunniit ingerlatsiviusunut taarsigassarsisitsisoqarsinnaanngilaq tapiiffigineqarsinnaanatillu. Taamaattorli inuussutissarsiutit annikinnerusut namminersorfusut tassani pineqanngillat.

Imm. 3. Inissianik sanaartornermut, iluarsaassinermit, allilerinermit pitsanngorsaaneremullu pisortanit tapiiffigineqartut, tapiissutit imaluunniit aningaasalersuineq pillugu inatsisinut allanut ilaasunut inissianut taarsigassarsisitsisoqarsinnaanngilaq.

§ 2. Inissianik sanaartornermut, pitsanngorsaaneremut, iluarsaassinermit imaluunniit allilerinermit piffissami sanaartornermi pilersarusiornermilu inatsimmik atuuttumik naammassinnittumik sanaartornermut taamaallaat taarsigassarsisitsisoqarsinnaavoq tapiiffigineqarsinnaassallutilluunniit.

§ 3. Taarsigassarsisitsinissamut tapiiffigitinneremullu neriorsuummik tunniussisoqannginnerani sanaartornissamut pituttuisumik isumaqatigiissusiorfusimanngitsunut imaluunniit sanaartornermi sulinermut aallartinneqarsimanngitsunut taamaallaat sanaartornermut taarsigassarsisitsisoqarsinnaavoq tapiiffigineqarsinnaassallutilluunniit.

Kapitali 2

Nutaanik illuliortiternernut taarsigassarsineq

§ 4. Inissiat nutaat sanaartornerinut aningaasartuutit tamarmiusut ilaannut aningaasalersorneqarnissaannut kommunalbestyrelsi taarsigassarsisitsisinnaavoq, tak. §§ 5-8.

Imm. 2. Inissiami inissiap annertussusia 110 m² tikillugu annerpaamik taarsigassarsisitsisoqarsinnaavoq, inissiap anginerunera apequtaatinnagu.

Imm. 3. Sanaartornermut aningaasartuutit tamarmiusut m²-imut ataatsimut annerpaamik 20.000 kr.-inut taarsigassarsisitsisoqarsinnaavoq, aningaasartuutit annertuneruneri apequtaatinnagit.

§ 5. Nuummi aningaasartuutit tamarmiusut 27 %-ii tikillugit kommunalbestyrelsi nutaamik inissialiornissamut taarsigassarsisitsinnaavoq, taamaattorli § 4, imm. 2 naapertorlugu annerpaamik naatsorsorneqartumik tassa 594.000 kr.-inik annerpaamik taarsigassarsisitsisoqarluni, taamaattoq tak. imm. 2 aamma 3.

Imm. 2. Imm. 1 malillugu taarsigassarsisitsineq imatut annikilliertortinneqassaaq:

- 1) 2019-imi taarsigassarsisitsinissamut neriorsuutitut 24 %-it, tassa annerpaamik 528.000 kr.-inik taarsigassarsisitsineq
- 2) 2020-mi taarsigassarsisitsinissamut neriorsuutitut 21 %-it, tassa annerpaamik 462.000 kr.-inik taarsigassarsisitsineq
- 3) 2021-mi taarsigassarsisitsinissamut neriorsuutitut 18 %-it, tassa annerpaamik 396.000 kr.-inik taarsigassarsisitsineq
- 4) 2022-mi taarsigassarsisitsinissamut neriorsuutitut 15 %-it, tassa annerpaamik 330.000 kr.-inik taarsigassarsisitsineq
- 5) 2023-mi taarsigassarsisitsinissamut neriorsuutitut 12 %-it, tassa annerpaamik 264.000 kr.-inik taarsigassarsisitsineq
- 6) 2024-mi taarsigassarsisitsinissamut neriorsuutitut 9 %-it, tassa annerpaamik 198.000 kr.-inik taarsigassarsisitsineq
- 7) 2025-mi taarsigassarsisitsinissamut neriorsuutitut 6 %-it, tassa annerpaamik 132.000 kr.-inik taarsigassarsisitsineq
- 8) 2026-mi taarsigassarsisitsinissamut neriorsuutitut 3 %-it, tassa annerpaamik 66.000 kr.-inik taarsigassarsisitsineq

Imm. 3. 2027-mi januaarip aallaqqaataanit sunniuteqalersumik Nuummi taarsigassarsisitsinissamut neriorsuinerimik nalunaaruteqartoqarsinnaangilaq.

§ 6. Qaortumi, Sisimiuni aamma Ilulissani kommunalbestyrelsi aningaasartuutit tamarmiusut 30 %-ii tikillugit nutaamik inissialiornissamut taarsigassarsisitsinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 660.000 kr.-inik annerpaamik taarsigassarsisitsisoqarluni.

§ 7. Maniitsumi, Aasianni aamma Tasiilami kommunalbestyrelsi aningaasartuutit tamarmiusut 35 %-ii tikillugit taarsigassarsisitsinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 770.000 kr.-inik annerpaamik taarsigassarsisitsisoqarluni.

§ 8. Illoqarfinni nunaqarfinnilu §§ 6 aamma 7-imi taaneqanngitsuni kommunalbestyrelsi aningaasartuutit tamarmiusut 40 %-ii tikillugit taarsigassarsisitsinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 880.000 kr.-inik annerpaamik taarsigassarsisitsisoqarluni.

§ 9. §§ 5-8 malillugit taarsigassarsiarititat inunnut ataasiakkaanut aammalu sanaartornermut aningaasartuutit tamarmiusut sinnerinut aningaasalersuinissap uppersarsarneqarnerani, taamaallaat taarsigassarsiaritinneqarsinnaapput.

§ 9 a. Inuit ataasiakkaat kisimik inissiamut ataatsimut taarsigassarsitinneqarsinnaapput.

Imm. 2. Inunnut ataasiakkaanut inissialiortiternernut aningaasalersuineq pillugu Inatsisartut inatsisaat imaluunniit inissialiortiternernut aningaasalersuineq pillugu siusinnerusukkut inatsisit naapertorlugit nutaanik inissialiornissamut taarsigassarsitinneqareersimasunut, taarsigassarsititsisoqarsinnaanngilaq.

§ 9 b. Sanatitsisoq namminersortoq inunnut ataasiakkaanut tuniniaanissaq siunertaralugu nutaanik inissialiorsinnaavoq. Kommunalbestyrelsi § 9 malillugu nutaanik inissialiornissamut taarsigassarsititsinissamut neriorsuuteqarsinnaavoq. Nutaanik inissialiornissamut taarsigassarsititsisarneq pillugu aalajangersakkat taamaaqataanik atuutissapput.

Imm. 2. Sanatitsisup namminersortup atuilernissamut akuersisummik tunniussereernerup kingorna qaammatinit 12-init kingusinnerusumi nutaanik inissialianik tunisinerani, inissianut tunineqarsimanngitsunut taarsigassarsititsinissamut neriorsuut ilimasaarinertaqanngitsumik atorunnaassaaq.

§ 10. §§ 5-8 naapertorlugit taarsigassarsitsinerit inissiami qularnaveeqqusiinikkut qulakkeerneqassapput. Sanaartornermi aningaasartuutit tamarmiusut sinnerisa sillimmasiinemullu akiliussinerit aningaasalersornissaannut inissiami qularnaveeqqusiilluni taarsigassarsineq taarsigassarsitsinerit ataqqissavaat.

Imm. 2. Taarsigassarsiat atulernissaanut akuersisummut ulluliussamiit ukiuni 20-ni ernialersorneqarnatillu akilersugassaannngillat, tamatumalu kingorna Nationalbankip erniaritittagai procentinik pingasunik ilallugit erniaqartinneqarlutik amerlaqatigiinnik annertussusilerlugit ukiuni 15-ini akilersugassanngussallutik. Taarsigassarsinermi allagartap qanoq iluseqarnissaa suullu piumasaqaataassanersut kommunalbestyrelsimit aalajangersarneqassapput.

Imm. 3. Taarsigassarsiat akilersornissaannut akiligassallu akilersornissaannut maleruagassanik Naalakkersuisut aalajangersaasinnaapput.

§ 11. § 10, imm. 1-imi illunut pineqartunut atatillugu piginnittut tamatigit nikinneri pillugit kommunalbestyrelsi ilisimatinneqartassaaq. Inissialiortiternernut aningaasalersuineq pillugu Inatsisartut inatsisaat imaluunniit inissialiortiternernut aningaasalersuineq pillugu siusinnerusukkut inatsisit naapertorlugit nutaanik inissialiornissamut taarsigassarsiaqariinngitsunut piginnittut nikinnerat eqqaassanngikkaanni, §§ 5-8 malillugit taarsigassarsiat piginnittut nikinneranni akiligassanngortinneqassapput. Ingerlatseqatigiiffinni, peqatigiiffinni assigisaannilu pigisanik aalaakkaasunik piginnittuunissamik, attartortitsinissamik imaluunniit allatut ingerlatsinissamik pingaarnertut siunertaqartuni pigisanik, piginneqataassutini, aktiaatinik assigisaannillu tunniussineq aammattaaq piginnittut nikinnerattut isigineqarpoq.

Imm. 2. Piginnittut nikinnerini tamani kommunalbestyrelsip taarsigassarsitsinerani taarsigassarsiat atsiorneqarnerisa angissusiata 15 %-iatut annertutigisumik piginnittut nikinnerannut akiliutissaaq akilernerneqartassaaq. Kommunalbestyrelsip taarsigassarsitsineranik tigusinnermut piumasarineqarpoq

piginnittut nikinneranni akiliutip akilernerqarnissaa.

Imm. 3. Atulernissaanut akuersissutip tunniunneqarnerata kingorna qaammatinik arfinilinnik kingusinnerusumik pisunut inissianik nutaatut sanaartorneqartunik tunisinermi taarsigassarsitinneqarnissamut neriorsuummik tunniussineq piginnittut nikinnerattut isigineqarpoq piginnittut nikinneranni akiliummik akiliisussaaffusoq.

Imm. 4. Piginnittut nikinnerini, pisisumit tiguneqartut taarsigassarsiat katinneri aamma niuernermi aningaasartuutit missiliussat tapiliunneri ilanngaatilugit pisinermi akip 90 %-iinik annerpaamik aningaasartaqartut taarsigassarsiat kommunalbestyrelsip taarsigassarsiarititaasa ataqqissavai.

§ 12. Kommunalbestyrelsip §§ 5-8 naapertorlugit taarsigassarsiarititai akiligassaatinneqassapput:

- 1) Erniat taarsigassarsialluunniit akilersuutit akilernerqanngippata, aamma illumi qularnaveeqqusiissaqarluni taarsigassarsinermi allagartaq naapertorlugu erniat akilersuutillu akilernissaat pillugu maleruagassat malillugit piffissaliussap naanissaa sioqqullugu akiligassanik akilinngisanik taarsigassarsisoq akiliisimanngippat, tak. qularnaveeqqut pillugu Kalaallit Nunaannut inatsit.
- 2) Taarsigassarsisoq inissiamik illersorneqarsinnaasumik aserfallatsaaliuisimanngippat, paasineqarpallu kommunalbestyrelsip qularnaveeqqusiissutikkut qulakkeeriffigisaa taamaalluni ajornerulersoq.
- 3) Taarsigassarsisup inissiaq ikuallattoornissamut illullu ajoqusersinnaaneranut sillimmasersimanngippagu.
- 4) Inissianik attartorneq pillugu inatsisartut peqqussutaanni attartortitsineq pillugu aalajangersakkanut akerliusunik inissiamik taarsigassarsisoq attartortitsippat.
- 5) Inissiami ininik inuussutissarsiorfusunik aaqqissuussisoqarsimappat imaluunniit inissiamiit inuussutissarsiummik ingerlatsisoqarpat. Inuussutissarsiutilli annikinnerusut namminersorfiusullu pineqanngillat.
- 6) Taarsigassarsisoq piginnittut nikinneri pillugu taarsigassarsisitsisumut nalunaaruteqanngitsoorpat aamma pisunik utoqqatsissutaasinnaasunik peqanngippat.
- 7) Piginnittut nikinnerini piginnittut nikinnerini akiliummik taarsigassarsisoq akiliinngitsoorpat.

Imm. 2. Imm. 1, nr. 4 taamaaqataani atorineqassaaq inissiaq inatsisitigut pisinnaatitaasumut pisussaataasumullu attartortinneqarpat.

Kapitali 3

Illunik pioreersunik iluarsaassinerit, pitsanngorsaanerit allilerinerillu

§ 13. Kommunalbestyrelsi inissiat pioreersut iluarsaannerinut, pitsanngorsarnerinut allilerneqarnerinullu tassani aningaasartuutit tamarmiusut 40 %-ii tikillugit taarsigassarsisitsisinnaavoq taamaattorli annerpaamik 300.000 kr.-inik.

Imm. 2. Inissiamut ataatsimut iluarsaassinernut, pitsanngorsaanernut imaluunniit allilerinernut ataasiaannarluni taarsigassarsisitsisoqarsinnaavoq.

Imm. 3. Allilerinerup kingorna 110 m²-imik annertunerusumik angissuseqartunut inissianut allilerinermut taarsigassarsisitsisoqarsinnaanngilaq.

§ 14. § 13 naapertorlugu taarsigassarsisitsinermut piumasarineqarpoq:

- 1) Inissiaq inissiamik piginnittumut, taassuma aappaanut imaluunniit meeqqanut inersimanngitsunut inissiatut atorpeqassasoq.
- 2) Inissiaq piffissami qinnuteqarfusumi ukiunik 20-inik pisoqaanerussasoq.
- 3) Inissiaq ikuallattoornissamut illullu ajoqusersinnaaneranut sillimmaserneqarsimassaaq aamma sillimmasiinermi akiliutissatigut kinguaattoortoqarsimanani.

Imm. 2. Iluarsaassinermut, pitsanngorsaanimut allilerinermullu aningaasartuutit tamarmiusut sinnerinut taarsigassarsisoq nammineq aningaasalersuissappat taamaallaat taarsigassarsisitsisoqarsinnaavoq.

Imm. 3. Aappaasumut sanilliunneqarpoq nalunaarsorsimalluni apparisaq, imaluunniit ukiuni 2-ini kingullerni inooqatigiissimappata, katissimanermut assingusumik inooqatigiinneq.

§ 15. Inuulluarniutitut taaneqarsinnaasunut iluarsaassinernut imaluunniit pitsanngorsaanimut taarsigassarsisitsisoqarsinnaanngilaq.

§ 16. Inissiami qularnaveeqqusiussinikkut qulakkeerneqartumik taarsigassarsiatut ernialersorneqanngitsutut akilersugassaangitsutullu taarsigassarsisitsisoqassaaq. Inissiami qularnaveeqqusiussinikkut taarsigassarsiaasinnaasut allat taarsigassarsinerup ataqqissavai.

§ 17. Kommunalbestyrelsip taarsigassarsisitsinera, tak. § 13 piginnittut nikinnerini akiligassanngortinneqassaaq, apparit akornanni piginnittut nikinneri eqqaassanngikkaanni aamma averusernermut imaluunniit avinnermut atatillugu piginnittut nikinneri imaluunniit kommunalbestyrelse allamik aalajangiisimanngippat.

§ 18. Kommunalbestyrelsip taarsigassarsisitsinera tak. § 13 aamma akiligassanngortinneqassaaq:

- 1) Taarsigassarsisoq inissiamik illersorneqarsinnaasumik aserfallatsaaliuisimanngippat, kommunalbestyrelsillu paasippagu kommunalbestyrelsip qularnaveeqqusiissutikkut qulakkeeriffigisaa taamaalilluni ajornerulersoq.
- 2) Taarsigassarsisup inissiaq ikuallattoornissamut illullu ajoqusersinnaaneranut sillimmaserneqarsimappat.
- 3) Inissianik attartorneq pillugu inatsisartut peqqussutaanni attartortitsineq pillugu aalajangersakkanut akerliusunik inissiamik taarsigassarsisoq attartortitsippat.
- 4) Inissiami ininik inuussutissarsiornermut aqqissuussisoqarsimappat imaluunniit inissiamiit inuussutissarsiummik ingerlatsisoqarpat. Inuussutissarsiutilli annikitsut namminersorfiusullu ilaanngillat.
- 5) Inissiaq taarsigassarsisitsisumut initut atorpeqanngippat.

Imm. 2. Imm. 1, nr. 3 taamaaqataanik atorpeqassaaq inissiaq inatsisitigut pisinnaatitaasumut pisussaataasumullu attartortinneqarpat.

Kapitali 4

Illunik pioreersunik soraarnermusialinnut pigineqartunik iluarsaassinertit

§ 19. Soraarnermusialimmit inissiatut atorneqartunut aamma soraarnermusiaqartoq taassumalu aapparisaq, marluullutik inissiamik kisimiillutik pigineqartumut inissiamik pioreersumik iluarsaassinermut kommunalbestyrelsi 300.000 kr.-it tikillugit taarsigassarsitsisinnaavoq.

Imm. 2. Soraarnermusiaqartutut isigineqarput inuit utoqqalinersiuteqarnissamik, siusinaartumik utoqqalinermusiaqarnissamik pisinnaatitaasut imaluunniit atorfilittut utoqqalinermusiaqartut.

Imm. 3. Aappaasumut sanilliunneqarpoq nalunaarsorsimalluni aapparisaq, imaluunniit ukiuni 2-ni kingullerni inooqatigiissimappata, katissimanermut assingusumik inooqatigiinneq.

Imm. 4. Peqatigisaanik kapitali 3 naapertorlugu taarsigassarsitsisoqarsinnaangilaq.

§ 20. Inissiap atorneqarnerata imaluunniit atugaanerata allanngortinnissaanik siunertaqartunut imaluunniit kinguneqartunut imaluunniit inuulluarniutitut taaneqarsinnaasunut iluarsaassinernut pitsanngorsaanernullu taarsigassarsitsisoqarsinnaangilaq.

§ 21. Iluarsaassinissamut taarsigassarsitsisinissamut, tak. § 19 piumasarineqarpoq:

- 1) Iluarsaassinerup aningaasalersornissaanut aningaaserivimmi imaluunniit illuummik qularnaveeqqusiilluni taarsigassarsitsisarfimmi nalinginnaasumik piumasaqaatit malillugit taarsigassarsinissamut itigartitaasimaneq.
- 2) Inissiaq ikuallattoornissamut aamma illup ajoqusersinnaaneranut sillimaserneqarsimanissaa aamma sillimasiinermi akiliutissani kinguaattoortoqarsimannginnissaa.
- 3) Inissiami piginneqataasup aappaasup iluarsaassinermut aamma taarsigassarsinissamut akuersisimanissaa.

§ 22. Kapitali manna malillugu inissiami tamarmiusumi qularnaveeqqusiussinikkut qulakkeerneqartumik taarsigassarsiatut ernialersorneqanngitsutut akilersugassaanngitsutullu taarsigassarsitsisoqassaaq. Inissiami qularnaveeqqusiussinikkut taarsigassarsiaasinnaasut allat taarsigassarsinerup ataqqissavai.

§ 23. Kommunalbestyrelsip taarsigassarsitsinera piginnittut nikinnerini akiligassanngortinneqassaaq, taarsigassarsisup taassumalu aappaata akornanni piginnittut nikinneri eqqaassanngikkaanni imaluunniit kommunalbestyrelse allamik aalajangiisimanngippat.

§ 24. Kommunalbestyrelsip taarsigassarsitsinera tak. § 19 aamma akiligassanngortinneqassaaq:

- 1) Taarsigassarsisup inissiaq ikuallattoornissamut illullu ajoqusersinnaaneranut sillimasersimanngippagu.
- 2) Inissiaq attartortinneqarpat.
- 3) Inissiaq soraarnermusiaqartumut initut atorneqanngippat.
- 4) Inissiami ininik inuussutissarsiornermut aqqissuussisoqarsimappat imaluunniit inissiamiit inuussutissarsiummik ingerlatsisoqarpat. Inuussutissarsiutilli annikitsut namminersorfiusullu ilaangillat.

Kapitali 4 a

Iluarsaassinernut, pitsanngorsaanernut alliliinernulluunniit tapiissutit

§ 24 a. Inissianut, inunnit ukiuni akileraarfusuni kingullerni marlunni inunnit ukiumut 300.000 koruunit inorlugit isertitaqarsimasunit pigineqartunut, imaluunniit inunnit, ulloq manna tikillugu isertitarisimasaat apeqqutaatinagit siunissami qanittumi inoqutigiinni ukiumut 300.000 koruunit inorlugit isertitaqartussatut naatsorsuutigineqartunit pigineqartunut annerpaamik 150.000 koruuninik inissiamik iluarsaassinermut, pitsanngorsaannermut imaluunniit alliliinermut kommunalbestyrelsi tapiissuteqarsinnaavoq.

Imm. 2. Taamaallaat inissiamut Namminersorlutik Oqartussanit taarsigassarsisoqarsimappat, imaluunniit maanna piginnittuusut taarsigassarsisuullutik Namminersorlutik Oqartussanit taarsigassarsisoqarsimappat kommunalbestyrelsi tapiissuteqarsinnaavoq.

Imm. 3. Meeqqanut suli angerlarsimaffimmi najugaqartunut, 18-it inorlugit ukioqartunut, najukkami inuit nalunaarsorsimaffianni nalunaarsorsimasunut, taamaattorli amerlanerpaamik meeqqanut arfinilinnut, isertitassanut killigitat meeqqamut ataatsimut 4.000 koruuninik qaffanneqartassapput.

§ 24 b. Piffissaq qinnuteqarfusoq sioqqullugu qaammatit 60-it kingulliit ingerlanerini pisortat inissiamik iluarsaassinissamut, pitsanngorsaannissamut alliliinissamulluunniit tapiissuteqarsimappata, kommunalbestyrelsi tapiissuteqarsinnaanngilaq.

Imm. 2. Inissianut sumiiffinni, nalinginnaasumik inissiaq qularnaveeqqusiullugu aningaaserivimmit imaluunniit realkreditimit taarsigassarsiviusinnaasuni inissisimasunut kommunalbestyrelsi tapiissuteqarsinnaanngilaq.

Imm. 3. Kommunalborgstyreli § 24 a naapertorlugu qinnuteqaammik naliliinermini uku eqqarsaatigissavai:

- 1) iluarsaassinissamut kissaatigisap annertussusissaa,
- 2) alliliinerup pitsanngorsaannerulluunniit qinnuteqartup pigisaanut nalilinnut aammalu nammineerluni suliaqarnissamut piginnaaneqarneranut sanilliunneqarnissaa, kiisalu
- 3) inissiap pisoqaassusia niuerutigineqarnermilu nalinga.

Imm. 4. Naalakkersuisut inissiamik iluarsaassinermut, pitsanngorsaannermut alliliinernulluunniit maleruagassiorsinnaapput, taakkunungalu aqutsineq, aningaasat tunniunneqarnerat suliaassallu tapiiffigineqarsinnaatitaasut ilaatinneqarput.

Kapitali 5

Ataatsimut aalajangersakkat

Taarsigassarsinissamut qinnuteqaatinik aqutsineq il.il.

§ 25. Inatsisartut inatsisaat manna naapertorlugu, suliamik suliarinninnermi aningaasartuutitut matussutissatut kommunalborgstyreli taarsigassarsiaritat 0,5 procentiinik annertussuseqartumik akileeqqusisoqassaaq.

Imm. 2. Piffissami taarsigassarsisup taarsigassarsiat tunniuteqqullugit kommunalborgstyreli qinnuteqarfigisaani taarsigassarsisup akitsuut kommunalborgstyreli akilissavaa. Taamaattoq taarsigassarsianik tunniussinnermi akiliutissaq ilanngaatigineqassasoq, kommunalborgstyreli aalajangersinnaavoq.

§ 26. Kommunalbestyrelsi qularnaveeqqusiinermut allagartap atsiorneqarneranut atatillugu suliamik suliarinninnermut akitsuummik 1.250 kr.-inik akileeqqusisinnaavoq.

Imm. 2. Kommunalbestyrelsi aningaaserivimmut ataatsimut amerlanerusulluunniit qularnaveeqqusiinermi allagartap atsiorneqarnissaanut kiisalu akitsuummik akileeqqusinissamut piginnaatitsissummik tunniussisinnaavoq.

§ 27. Inissianik nutaanik sanaartornissamut qinnuteqaatit allakkatigut kommunalbestyrelsimut nassiunneqassapput.

Imm. 2. Qinnuteqaammut ilanngunneqassapput:

- 1) Pilersaarummut nassuiaat inissiat amerlassusaannut inissiamullu ataatsimut inissiap annertussusaa pillugu paasissutissanik imaqartoq.
- 2) Sanaartornermi aningaasartuutitut tamakkiisunut missingersuutit.
- 3) Kommunalbestyrelsimiit nunaminertamik immikkoortitsineq imaluunniit nunaminertamik tunineqarneq.
- 4) Nammineerluni aningaasalersuutissat pissarsiarisimanerinit uppersarsaat, tak. § 9.
- 5) Qinnuteqartoq Inatsisartut inatsisaanni matumani imaluunniit inatsisini allani taarsigassarsiaqariinngitsoq uppersarsaat, takuuk § 1, imm. 3.
- 6) Qinnuteqartup cpr. normua, najugaqarnermut allagartaq imaluunniit alla kinaassutsimik erseqqissumik takutitsisoq.
- 7) Qinnuteqartup pisortanut akiitsoqarnera pillugu Akiliisitsiniarnermut oqartussaniit nalunaarut.

Imm. 3. Qinnuteqaatit nassiunneqartut tunngavigalugit qinnutigineqartut aningaasaliissutigineqarsinnaanersut kommunalbestyrelsi isummissaaq.

§ 28. Inissiani pioreersuni iluarsaassinernut, pitsanngorsaanernut allilerinernulluunniit taarsigassarsinissaq pillugu qinnuteqaat, kapitali 3 aamma 4 naapertorlugu, kommunalbestyrelsimut allakkatigut nassiunneqassaaq.

Imm. 2. Qinnuteqaammut ilanngunneqassapput:

- 1) Iluarsaassinissamut, pitsanngorsaanissamut allilerinissamulluunniit kissaatigineqartumut nassuiaat.
- 2) Inissiaq pillugu nassuiaat, tassunga ilanngullugit pisoqaassusaa, angissusaa qanorlu pitsaassuseqarnera.
- 3) Suliassami aningaasartuutitut tamarmiusunut missingersuusaaq.
- 4) Sulineq pineqartoq nunaminertamik tunineqarnissamik pisariaqartitsippat kommunalbestyrelsimiit nunaminertamik immikkoortitsineq imaluunniit nunaminertamik tunineqarneq.
- 5) Nammineq aningaasalersuisinnaanermut uppersarsaat.
- 6) Qinnuteqartup cpr. normua aamma najugaqarnermut allagartaq.
- 7) Inissiamut piginnittuuneq pillugu uppersarsaat.
- 8) Qinnuteqartup pisortanut akiitsoqarnera pillugu Akiliisitsiniarnermut oqartussaniit nalunaarut.

Imm. 3. Qinnuteqaatit nassiunneqartut tunngavigalugit qinnutigineqartut aningaasaliissutigineqarsinnaanersut kommunalbestyrelsi isummissaaq.

§ 29. 25.000 kr.-it sinnerlugit pisortanut akiitsunik akilerneqartussanik akiliisimanngitsumut qinnuteqartumut taarsigassarsisitsinissamut kommunalbestyrelsi neriorsuuteqarsinnaanngilaq.

§ 30. Taarsigassarsinissamik qinnuteqaat kommunalbestyrelsimit akuerineqarpat taarsigassarsinissamut neriorsuut tunniunneqassaaq, tassanilu taarsigassarsiat annertussuserigallagassaat aammalu taarsigassarsinermi piumasaqaatit allassimassallutik.

Imm. 2. Kommunalbestyrelsip taarsigassarsisitsinerani aningaasaliissutaasunut tunngavigineqartuni aningaasartuutitut missingersuutini allangortoqarpat, allanguinerlu taarsigassarsiat inaarutaasumik annertussusiannut sunniuteqarpat, taarsigassarsinissamik qinnuteqartoq pisariaqanngitsumik kinguarsaanani tamanna kommunalbestyrelsimut nalunaarutigissavaa. Taamaattoqanngippat inaarutaasumik taarsigassarsiat neriorsuutigineqartuniit annertunerulersinneqarsinnaanngillat.

§ 31. Taarsigassarsiat inaarutaasumik annertussusaat sanaartornermi inaarutaasumik naatsorsuutit tunngavigalugit naatsorsorneqassapput. Sanaartornermi inaarutaasumik naatsorsuutit suliamut attuumassuteqanngitsumit uppersarneqassapput.

Imm. 2. Taarsigassarsinissamik qinnuteqartup nammeneq sulinerata nalinga aningaasartuutitut tamarmiusunut ilaassanngilaq, tak. imm. 1. Tamannali sanaartornerup iluani taarsigassarsisoq ileqquusumik suliffeqarneranut atasumik taarsigassarsisoq suliaqarpat atuutissanngilaq.

§ 32. Inissiap sanaartorneqarnera, iluarsaanneqarnera, pitsanngorsarneqarnera allilernerqarneralu neriorsuutitut allakkiap tunniunneqarneraniit ukiut marluk iluanni aallartinneqareersimassaaq kiisalu ukiut pingasut iluanni naammassineqarsimallunilu atorneqalereersimassalluni. Taamaattoqanngippat neriorsuut siumoortumik nalunaarutigineqarani atorunnaarsinneqassaaq.

Imm. 2. Taarsigassarsisoq neriorsuutitut allakkiap tunniunneqarneraniit ukiut marluk iluanni suliniut aallartinneqarsimanersoq imaluunniit aallartinneqarsimannginnersoq pillugu kommunalbestyrelsimut paasisutissanik nassiussissaaq.

Imm. 3. Taarsigassarsisoq neriorsuutitut allakkiap tunniunneqarneraniit ukiut pingasut iluanni atuilernermit akuersissutip assilineranik kommunalbestyrelsimut nassiussissaaq.

Imm. 4. Kommunalbestyrelsi immikkut pisuni piffissami killissarititaasut imm. 1-imi allassimasuniit immikkut akuersissuteqarsinnaavoq.

Taarsigassarsianik tunniussineq

§ 33. Sanaartorneq, iluarsaassineq, pitsanngorsaaneq imaluunniit allileringeq naammassineqarpat aamma sanaartornermi naatsorsuutit uppersarneqarsimasut aamma qularnaveeqqusiussaqluni taarsigassarsinermi allagartap uparuagassartaqanngitsup naqeqqaarneranik nalunaarsorneqarsimasup naqissuserneqarsimasullu kiisalu ikuallattoornissamut illullu ajoqusernissaanut sillimasiisimanermut uppersaatiptakutinneqarnerisigut taarsigassarsiat tunniunneqassapput. Taamaattorli aningaasaliissutit kommunalbestyrelsip missingersuusiutut akuerisaanni ukiumi ilanngunneqarfianni ukiumi siusinnerpaamik taarsigassarsiat tunniunneqarsinnaallutik.

Imm. 2. Sanaartornermi allilernermilu taarsigassarsiat pissarsiarineqarnissaannut aamma piumasarineqarpoq atulernissaanut akuersissuteqarnissaaq.

§ 34. Inatsisartut inatsisaat una naapertorlugu taarsigassarsiniartumut pisortanut akilernerqarsimanngitsunik akiitsoqartumut taarsigassarsiat tunniunneqarsinnaanngillat. Akiitsut

akilerneqarsimanngitsut aaqqinnissaannut taarsigassarsiat Akiliisitsiniartarfimmut kommunalbestyrelsip tunniutissavai. Nuussineq imaluunniit eqqartuussivikkut malersuineq naapertorlugu taarsigassarsianit iluanaarutissat sinneri taarsigassarsisumut imaluunniit pisussaatinneqartumut tunniunneqassapput.

Imm. 2. Taarsigassarsiat tunniunneqarnissaat sioqqullugu kommunalbestyrelsi taarsigassarsisup pisortanut akiitsoqarnerseq pillugu Namminersorlutik Oqartussani Akiliisitsiniartarfimmit nalunaarummik pissarsiniassaaq.

Illup angissusia aamma kvadratmeterimut akit

§ 35. Inissiap annertussusaa inissiami init tamarmik annertussusaattut naatsorsorneqassaaq, tak. imm. 2. Pequusiviit, quit, biilnut oqqussiviit, aneerasaartarfii imaluunniit biilit unittarfii, illup silammut iigaasa avataaniittut imaluunniit inissiamit immikkoortillugit inissiat naatsorsuineri ilanngunneqassanngillat, taakku oqorsarlugit inigissatut atorineqassanngippata.

Imm. 2. Inissiap annertussusaa imatut naatsorsorneqassaaq:

- 1) Naqqup ataani inissiap annertussusaa naqqup ataata silammut iigaaniit illup takissusaanut silissusaanullu amerlisitsilluni naatsorsuinikkut uuttorneqassaaq. Naqqup ataa tamakkerluni atorineqanngippat, inissiap annertussusaa illup iluani iikkat ininik immikkoortitsissutaasut qeqqaniit uuttisoqassaaq. Init nateqanngitsut naqqi tamakkerlutik cementimik betonimilluunniit qallerneqarsimasut uuttortaanermi ilanngunneqassanngillat.
- 2) Inissiap quleriinnerni init quleriinni nalinginnaasumiittut inissiami ataatsimi silami iikkamiit imaluunniit qaliata silataani iikkamiit, tak. nr. 3, aamma inissiap avinnerata qeqqaniit annertussuseq uuttorneqassaaq. Ilaqutariinnut arlalinnut inissiani uuttortaanermi illup isua iikkatut inissianut immikkoortitsissutaasut affartut nalilerneqartarpoq. Qisuit qalliutaasut marluuppata ataatsip uuttorneqarnera qisuup alliup silataaniit uuttisoqassaaq.
- 3) Qaliani inissiap annertussusaata naatsorsornerani, illup takissusaanut silissusaanullu amerlisitsilluni naatsorsuinikkut uuttisoqassaaq. Takissuseq inissiap quleriivini nalinginnaasuni uuttisarnertut uuttorneqassaaq, silissuserlu silami qaliat qalliutaasa qalipaa naqqaniit 1,5 meterinik portussuseqartut akornanni uuttorneqassalluni. Ilassutit, soorlu aniinganerit, iikkat inimit killiliissutaasut silataannit uuttorneqassapput.

Imm. 3. Naqqup ataani qalianilu init imm. 2, nr. 1-imi aamma 3-mi taaneqartut aatsaat najugassatut ilusilersorneqarsimappata, init annertussusaat uuttortaanermut ilanngunneqassapput.

Imm. 4. Init aalajangersimasumik nateqanngitsut uuttortaanermut ilanngunneqassanngillat, taamaattorli tak. imm. 5.

Imm. 5. Inissiami majuartarfii annertussutsimik uuttortaanermi inini quleriinni atorineqarfigisaminni ilanngunneqassapput. Iserterfiit, majuartarfii majuartarfillu sangoriaat ataatsimut atorineqartut, illup silammut iigaasa iluini inini kiassakkani inissimasut angissusaannut naapertuuttumik uuttortaanermut ilanngunneqassapput, taamaattorli annerpaamik 11 kvadratmeterinik annertussusilerneqassallutik.

§ 36. Inissiap kvadratmeterimut akia inissiap sanaartornerani aningaasartuutit tamarmiusut inissiap initaanit tamarmiusunit agguarneqarnera tunngavigalugu naatsorsorneqassaaq.

Kapitali 6

Taarsigassarsiat inaarlugit akilerneqarneri

§ 37. Inissianik nutaanik sanaartornermut taarsigassarsiaasunik piffissaq sioqqullugu taarsigassarsisup taarsigassarsianik inaaraluni akiliinerani akiitsut sinneri ullormi qinnuteqaatip tunniunneqarnerani 3 %-imik ernialerlugit Nationalbankip erniaritittagai ilanngullugit akilersukkat kingumut naatsorsorneqassapput. Akiitsut sinneri taarsigassarsisup allakkatigut inaarilluni akiliinissaq pillugu noqqaaneraniit aamma taarsigassarsiani piffissamut ernialersuiffiunanilu akilersuiffiusussaangitsumut sinneruttumut kingumut naatsorsorneqassapput, taamaattorli taarsigassarsiat tunniunneqarneranniit siusinnerpaamik ukiunut tallimanut.

Kapitali 7

Atulernissaanut, atorunnaarsitsinermit ikaarsaarnermullu aalajangersakkat

§ 38. Inatsisartut inatsisaat ulloq 1. januar 2018-imi atuutilissaaq.

Imm. 2. Peqatigisaanik illuliortiternermi aningaasalersuineq pillugu Inatsisartut peqqussutaat nr. 1, 7. maj 2007-imeersoq atorunnaarsinneqarpoq.

§ 39. Taarsigassarsiat aamma taarsigassarsinissamut neriorsuinerit, ulloq 1. januar 2018 sioqqullugu tunniunneqarsimasut imaluunniit nalunaarutigineqarsimasut piumasaqaatit allanngortinnagit ingerlatiinnarneqassapput.

Imm. 2. Inatsisartut inatsisaanni matumani § 37-mi pineqarput inissianik nutaanik sanaartornermut taarsigassarsiat aamma taarsigassarsinissamut neriorsuineq 1. januar 2018-ip kingorna tunniunneqartut imaluunniit nalunaarutigineqartut.

§ 40. Qinnuteqartut, ulloq 1. januar 2018 sioqqullugu taarsigassarsinissaq pillugu neriorsorneqarsimasut taarsigassarsiallu tunniunneqarsimanatik, qinnuteqartoqarneratigut inatsisartut inatsisaanni matumani maleruagassat naapertorlugit taarsigassarsinissamut neriorsuummik nutaamik nalunaarfigineqarsinnaapput.

Inissianik aningaasalersuisarneq pillugu Inatsisartut inatsisaat nr. 36, 28. november 2019-imeersoq (Inissialiortiternermut tapiissutitalimmik illulianik iluarsaassinermit, pitsanngorsaannermit alliliinermullu taarsigassarsititsisarneq tapiissuteqartarnerlu^[i] imatut atortuulersitsinermit aalajangersagaqarpoq:

§ 2

Inatsisartut inatsisaat 1. januar 2020-mi atuutilerpoq.

Inatsisartut inatsisaat nr. 19 30. november 2020-meersoq (Nutaanik inissialiornissamut taarsigassarsiaritit taamaallaat inunnut taarsigassarsiaritinneqartassapput aammalu inuit inissiamut ataatsimut taamaallaat taarsigassarsinnaallutik)² atuutilerneranut aalajangersakkat imarivai:

§ 2

Inatsisartut inatsisaat ulloq 1. januar 2021 atuutilerpoq.

Imm. 2. Inissialiortiternernut aningaasalersuineq pillugu Inatsisartut inatsisaat imaluunniit inissialiortiternernut aningaasalersuineq pillugu siusinnerusukkut inatsisit naapertorlugu nutaanik inissialiornissamut taarsigassarsiat pioreersut, piginnittut nikinnissaasa tungaanut allannguuteqartinnagit ingerlatiinnarneqarput.

Imm. 3. Ulloq 1. januar 2021 sioqqullugu inissialiortiternernut aningaasalersuineq pillugu Inatsisartut inatsisaat imaluunniit inissialiortiternernut aningaasalersuineq pillugu siusinnerusukkut inatsisit naapertorlugu nutaanik inissialiornissamut taarsigassarsititsinissamik neriorsuutit, pisussaaffiliisumik sanaartornissamut akigititassanut isumaqatigiissuteqartoqarsimanngippat, Inatsisartut inatsisaanni pineqartunut ilaatinneqarput.

Imm. 4. Ulloq 1. januar 2021 sioqqullugu nutaanik inissialiornissamut taarsigassarsititsinissamik neriorsuutit aammalu pisussaaffiliisumik sanaartornissamut akigititassanut isumaqatigiissuteqartoqareersimatillugu, atugassarititaasut allanngortinnagit ingerlatiinnarneqarput. Taarsigassarsisup isumaqatigiissuteqarfigisaanit taassuma isumaqatigiissuteqarfigisaanut piginnittut nikinneranni § 1, nr. 2 aamma 3 atuutissapput.

Ineqarnermut Attaveqqatigiinnermullu Naalakkersuisoqarfik, ulloq 8. marsi 2023

Ruth Lindhardt (atsior.)

Naalakkersuisoqarfinni pisortaaq

/ Embla Kristjánsdóttir (atsior.)

[i] Inatsimmi allannguutit ukuupput §§ 1-3, § 24 a aamma § 24 b.

² Inatsimmi allannguutit ukuupput § 9, § 9 a, § 9 b, § 11, imm. 1, § 27, imm. 2-imi, nr. 5.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut